

Quant religiosa è la populaziun svizra?

■ (anr) In studi dal Fondo naziunal cuntegn interessants detagls sco repostas sin las dumondas: Co statti cun la religiun en Svizra e co s'imagina ina societad individualisada Dieu? Il rapport surlonder (in cudesch) tira conclusiuns ch'èn per part dètg interessantas. Suandantamain be insaquantas. Ils perscrutaders (sociologs da religiun da Losanna e Son Gagl) partan la cuntrada religiosa-spirituala da la Svizra en quatter categorias cun zunt differentas immaginaziuns (maletgs) da la cardient-scha. La pli gronda gruppa furman ils «distanziads» cun 57%, suandads dals «instituziunals» che stattan damanaivel da lur baselgia (18%). 13% èn «alternativs» – esoterics e holistics – e 12% «seculars».

En las davosas gruppas datti grondas differenzas davart Dieu. Tar ils aderents da baselgias libras è Dieu in che fa miracas e per ils «alternativs» ina energia da glisch e forza. Tar ils «instituziunals catolics e protestants» è Dieu la maschaida d'ina figura da bab e mamma ed in «psicoanaliticher transcendental». Tenor ils «seculars» è Dieu «pura illusiu».

Tranter quellas gruppas sa fa in ferm process d'individualisaziun. En vista a la creschenta libertad religiosa sa decida il singul tenor criteris economicists da pretsch-prestaziun per ina tscherta pratica religiosa. Quella tenuta, che s'orientescha vers il consum, è creschida ferm dapi 1960. La pratica religiosa stat en concorrenza cun autras occupaziuns durant il temp liber. Quai impedeschia era fitg la socialisaziun religiosa dals uffants. L'effect è che la cuminanza religiosa fettschia pli e pli era marketing ecclesiastic.